

張文襄公奏議

張文襄公全集卷二十五

奏議二十五

香山紳士捐修寨城摺

光緒十四年九月二十二日

竊前准部咨各省捐修城工應於議修議築之始先行奏明存案該處有無軍務在於摺內詳細聲明等因通行遵照在案現據廣東布政使高崇基詳稱據香山縣紳士在籍候選道劉永康等呈稱世居縣屬之前山寨地濱海濫近接澳門城垣年久失修坍塌過半城內舊址狹隘居民生齒日繁駐足無地自應及時修拓以資棲止而固苞桑該紳自願捐資集事不敢請給官款當

經檄飭署廣州府海防同知蕭炳堃會同委員候補通判張士彥勘得前山寨城北依山麓西南面海東爲直走澳門之大路該城舊址長三百六十丈高僅八尺或五六尺不等現擬將東西南三面一律卸舊換新加展至三百三十七丈城脚用石城身用灰沙三合土築高一丈一尺城堞用磚高三尺五寸仍設東西南三門所有門鞏礮臺悉如舊址其北城舊基長一百六十五丈毋庸加展擬將城身築高一丈城堞亦三尺五寸通計周圍共長五百零二丈較之舊址加展一百四十二丈城牆皆厚七尺城外東南角開濠一道長一百五十丈

兩面砌堤共闊二丈六尺至於城身加展所用糧田稅地多係劉姓公產計城牆壓占田地一十一畝二分開濠用田六畝五分東西南三面拓城共用田地三十七畝內有別姓三畝九分由劉永康等給價買回一併捐作城基應完糧稅照舊輸納所有圈入地場仍歸原主管業分別勘丈明確核實估計共需經費銀四萬餘兩劉永康自願獨力擔承成此盛舉並不請官發款亦毋須別處籌捐據該同知等勘明圈築之處並無阻礙橋梁道路民情亦甚樂從並據劉永康等呈請開工等情稟覆到司由該司具詳請奏前來臣伏查前山寨城建

自前明天啟年間當水陸扼要之衝爲形勢所爭之地
內達香山縣城外接澳門十里而近在今日尤爲衝要
現因該城舊址窄狹民間棲止不敷邑紳劉永康等自
願出資修理加展城身一百四十餘丈所需經費及應
用田地悉係該紳捐給不動官款洵屬急公好義自應
准其開工修拓以順輿情惟粵省現無軍務該紳捐修
前山寨城係爲保衛居民鞏固海疆起見自當遵照部
章先行奏明存案一俟城工告竣委員驗收仍照民捐
民辦章程免其造冊報銷至劉永康等所捐修城經費
及拓作城基田地現飭分別開報姓名細數再加覆核

工竣之日合無仰懇天恩俯准給予獎敘以昭激勸
殊批著照所請該部知道欽此

電綫不宜與法接捐

光緒十四年十二月二十日

竊臣前准北洋大臣李鴻章來咨法國旱綫自鎮南關
邊外達東京西貢各處中國旱綫如與該綫相接則以
上各處電報自可接轉已准總理衙門咨允其接連咨
臣轉飭兩廣官電局遵辦等由臣當時卽慮其窒礙甚
多然來咨旣云總署允准只可照轉嗣據登萊青道盛
宣懷稟同前事其時已在北洋批准接連總署覆准之
後其准駁之權已不屬之於粵准固無所用其准駁亦

無從施其駁並非由臣批准而後定議也嗣後未據盛
宣懷將章程稟送近據十月二十一日該道電稟始知
又有廣東東興與越南芒街接綫之議臣見此事愈推
愈廣流弊愈多卽將其中窒礙及萬不可准情形詳悉
電達總理衙門及李鴻章查照隨接李鴻章復電云業
經畫押似難翻悔茲准李鴻章來咨知已具奏鈔錄摺
稿章程咨行到臣伏查接綫之議發之於法公司惟所
接乃兩廣地方之官綫所關乃兩廣地方之利害而創
議之初並未與兩廣督撫臣一商迨已有成說而後咨
臣接辦及定議之時亦無函電咨會迨臣電既發而云

已畫押在先李鴻章之批准盛宣懷之籌議無非爲中國受益起見所言有利無害各節謂各國未聞以電綫相連爲害原非絕無所見但於兩粵情形未能深悉且中外相交與外洋各國相交亦難一致臣責在粵疆固不敢好爲辯論亦何敢緘默依違查洋參贊博來說帖內云英國原有大東水綫可達各國中國旱綫雖接仍須由水綫轉寄價雖稍廉遲速迥異且多周折時須修理將來綫報未必能多等語是接綫並無大益明矣東興南關皆鄰越境中國設電本欲我之軍報速過於人如法亦可用則與法共其利且爲法占其利矣至有事

斷綫之說一日不失和一日不能斷廣西太平府上思
州廣東欽廉等處皆多教堂教民龍州係商務總匯之
區尤逼肘腋萬一有事虛失機宜彼皆頃刻可達避長
攻短盡洩密謀及至決裂斷綫戰守之先機已失矣或
謂教民到處皆有龍州卽不接綫彼亦可由香港海防
轉寄然緊急呼吸之際一迂一直利鈍卽殊教民固隨
處有之龍邊險要之區電綫軍情所係與尋常內地情
形似難並論然則無事接綫收利甚微有事斷綫受累
已迫此東西兩省電綫萬不可與法接之實在情形也
凡此種種利不敵害情形臣皆已詳電總署及李鴻章

無如臣在先未得與謀無從阻止電至業已畫押致難挽回查鎮南關官局電綫前年早已撤至憑祥擬逐漸收至龍州其東興官局電綫原爲勘界而設界務旣竣卽擬收至欽州而止經費旣屬難籌巡修尤爲不易東興地僻報稀更非南關可比南關東興之綫旣撤龍州欽州之距越界或百數十里或二百餘里斷無爲法國特造遠綫待其來接之理且東興一帶人情浮動邊民雜處時思與法相仇儻知此綫係爲法人來接而設難保不集聚多人生事毀拆文武官弁相距較遠恐彈壓照料不周轉多枝節此又東興電綫尤不可與法接之

實在情形也不特此也我代洋人傳報後累實多溯查光緒十二年八月間臣接英領事費里德照會稱准香港水師總兵移稱本月十八日下午兩點鐘零五十分本總兵發電報與瓊州英領事官詎是晚九點鐘始到似此耽閣已非一次中國電局如此任意將官報耽延實於該國家事務大有關礙等語當經臣嚴詞駁斥在案夫由廣至瓊僅逾三時中國電報之所常有此不過平日無甚關係之報彼已公然行文詰責視同彼之郵傳遲誤公文者然可謂謬妄無理之至英且如此何況於極暴極橫之法夫未與接連之綫洋人尙敢無理挑

別如其卽與接連彼此相共或遲或誤彼更有詞假使
兩電並需卽發先此後彼必致相爭後我先人亦無此
理且香港局大人多尙有遲誤南關東興地僻人少更
不免雷雨梗阻停待舛錯之虞勢必致各路電局委員
報生爲接遞洋報之故奔命不遑救過不暇領事查詢
公使瀆擾譙責辯析唇舌滋多不知中國自設電局本
無一事何苦而爲此也夫商局獲利受累猶可說也官
局無故而自擾不可解也現在南關之綫北洋已允接
連應如何嚴防流弊及密行補救之處可否敕下總理
衙門密籌酌辦至東興之綫昨接李鴻章來電云或可

推延中止屆期由粵酌量議奏等語應請敕下總理衙門查核存記如法人得步進步再來瀆陳卽以粵省官民不願辦理爲詞嚴拒其請地方幸甚

硃批該衙門知道欽此

潮橋鹽務疲弊改章試辦摺

光緒十五年二月二十八日

竊照潮橋鹽務遞年應銷額引二十萬零五千餘道額徵正餉銀一十二萬六千四百餘兩部飯銀一千九百六十餘兩均捐銅斤水脚銀九百八十餘兩爲廣東鹽課大枝向設有鹽運分司運同專司其事嘉慶二十一年以後銷路漸滯迭經奏准展限分年帶銷道光三年

以後遂至屢次奏請展緩奏銷年限自咸豐以來引地迭被匪擾鹽漏窮乏埠務尤壞閩私充斥遞年引鹽不能報銷足額每屆奏銷辦理竭蹶多至七成三分而止除道光咸豐年間展限奏銷不計外同治元年起至光緒五年奏銷止節經前督臣奏請展緩限期已至五次之多而催追守提仍復艱難萬狀兼以曬價運腳悉出於官運同籌備無資勢不能不暫借官款往往致有拖欠至已革前運同錢瑄虧帑尤鉅幾成不了之局經臣奏參勒追百計督催派員代爲經理方將奏銷勉強辦至七成一分嗣後兩次委令潮州府兼署運同重以事

權輕其費用復奏明行閩引地減釐節費所以設法維持者不遺餘力此兩年奏銷始能復還七成三分之數僅免拖欠公帑雖略有微效仍非長策且兼署本出一時權宜知府責在地方又不能人人皆熟鹺務斷無常令兼署鹽篆之理然使歸運同專辦則流弊更不可問厯考數十年來皆係減成奏銷雖亦有運同辦理得法仍不能有銖兩之增儻天時人事一有不齊卽必有鉅萬之短且不惟奏銷不足額已也厯屆展緩奏銷限期初則因乎匪擾後則沿爲疲玩每屆展緩少者三月多者十一月一屆之銷數不能有加而數月之課餉已歸

無著此則無形之短絀格外之取巧實使課餉於虧之中而又有虧者也查潮橋疲累之故約有數端埠商倒歇僅存空名暫招水客代辦曬運胥由官出銷數之旺歉視乎運本之多寡官本不裕收儲不廣船戶居奇商販勒捐雖有暢銷之機會已無可售之存鹽其累一運本至少亦須五六萬金運同無論實署之員何從籌此鉅本向來辦法皆係以印票重息向商號借貸近年間私日多鹽務利微迥非昔比迨稍有贏餘僅償逋負其累二資本不敷挪用課餉徵存正款藉口拖欠日久遂成侵虧其累三積重難返陋規痼習不能破除因而私

沖無忌愈致折閱其累四距省遑遑自爲風氣司巡敗
多薪工浩大酬應紛煩虛糜浮濫其累五運同新舊交
替舊任存鹽往往減價爭銷新舊兩任同致虧損其累
六運同部選者人地固屬生疏委署者爲日又不能甚
久幕友司事之盤踞書巡兵役之疲玩聯爲一氣牢不
可破其累七積弊相沿根株難拔奏銷永無足額之期
庫帑時有虧欠之患懲前慮後深切憂焦若不亟思變
計將并此七成三分之銷數亦且不可長恃即使日日
嚴檄追呼任任撤任參革亦屬無濟此潮橋鹽務疲壞
已極必須改絃更張之實在情形也臣督同鹽運使英

啟熟籌詳議迭派委員明察暗訪一切利弊現已灼然無疑必須盡破向來之成局始能挽救以後之頽綱查光緒十年准戶部通行開源節流事宜內鹽法一條云如四川督臣丁寶楨不避嫌怨一洗積弊歲入鉅款他省果能認真核實必有增益切勿觀望延宕等語是戶部極以四川改辦官運爲認真整頓又肇慶府黃江廠稅務積虧多年久未足額經臣奏准改章專派委員稽徵收數加倍具有明效今潮橋鹽務疲壞已極亟應查照部行酌採四川官運辦法仿照黃江廠稅務成案改章設局委員辦理蓋潮橋配運行銷悉由運同自主利

則歸已害則歸公消長盈虧莫可究詰若改歸委員澈底清查操縱悉在運司本籌於官利歸於國茲擬在潮州設立官運局由運司自行督辦遴委廉幹之員前往潮橋駐局專辦於運庫雜款項下撥還運本六萬兩俾資配運凡潮橋拆引配鹽督銷完餉緝私等事均責成委員一手經理仿照通綱章程蓋用運司三聯印照飭發領運按月截根繳查其潮屬各場官場務仍由運同考察各場鹽漏亦照舊由運同督飭整理以廣場產而濟埠銷至官運局引餉考成卽開列委員銜名以專責成其運同衙門另行於節省經費項下籌給津貼以資

辦公不准稍有阻撓運本足則場鹽無慮賣私浮費裁則成本較爲輕省設局另辦則衙門痼習一律革除委員接替則存鹽新舊不致爭售諸弊廓清正餉自裕查有試用知縣周福昌才具精強力任勞怨歷年委辦鹽務各差俱能認真整頓著有明效卽委該員充潮橋官運局總辦其一切詳細章程由運司隨時體察情形酌核飭辦嚴加考核竊惟潮橋鹽務疲敝積數十年此次改章滌弊於課餉必能大有起色斷不止歷屆七成三分之數如果天時人事一切平順應手或能辦足十成奏銷亦未可知現經切飭該總辦委員周福昌極力整

頓務將一切利弊豁然呈露果能解足十成奏銷則每年可增正課三萬四千餘兩創始既有明效以後接踵辦理者皆有成式可循斷不能聽其因仍朦混任意虧短從此常年正課可增鉅款創辦之功實非尋常出力可比查黃江廠稅務改章徵收加倍會蒙恩旨將創辦委員照異常勞績給獎經部議准行在案至廠稅係加增額外節省潮橋鹽務係加增正課難易輕重尤有不同自應籲懇恩施援照黃江廠稅成案准照異常勞績請獎以示鼓勵出自逾格鴻慈所有潮橋鹽務改章設局委員試辦各緣由據兩廣鹽運使英啟具詳請奏前

來臣覆核無異除咨部查照外理合恭摺具陳伏祈聖鑒

硃批戶部議奏欽此

請緩造津通鐵路改建腹省幹路摺

光緒十五年三月初三日

本年二月初六日承准軍機大臣字寄光緒十五年正月十五日欽奉 慈禧端佑康頤昭豫莊誠皇太后懿

旨前據總理海軍事務衙門奏請由天津至通州接修鐵路當經降旨允准嗣據御史余聯沅等先後陳奏請停辦鐵路均諭令總理海軍事務衙門會同軍機大臣妥議具奏茲據會商籌議逐款臚陳詳加披閱所陳各

節辨駁精詳敷陳剴切其於條陳各摺內似是而非之
論實能剖析無遺惟事關創辦不厭求詳在廷諸臣於
海防機要素未究心語多隔膜該將軍督撫等身膺重
寄辦理防務利害躬親自必講求有素著慶裕定安曾
國荃卞寶第裕祿張之洞崧駿陳彝德馨劉銘傳奎斌
王文韶黃彭年按切時勢各抒所見迅速覆奏用備采
擇等因欽此仰見朝廷勤求民隱鄭重海防之至意竊
惟泰西創行鐵路將及百年實爲馴致富強之一大端
其初各國開建幹路以通孔道迨後物力日裕闢路日
多支脈貫注都邑相屬百貨由是而灌輸軍屯由是而

聯絡上下公私交受其益初費鉅資後享大利其功效次第實在於此今中國方汲汲講求安攘之略自不得不采彼長技以爲自強之助伏查總理海軍事務衙門覆奏所陳迅海防省重兵便轉運通貨物興鑛產利行旅速郵傳捷賑濟諸條鐵路之利亦已詳明確實包舉無遺且欲推之南北各省廣安鐵路以振全局在王大臣謀畫閔遠本非專爲津通之一隅臣之愚見竊以爲今日鐵路之用尤以開通土貨爲急蓋論中外通商以後之時局中國民生之豐歉商務之息耗專視乎土貨出產之多少與夫土貨出口較洋貨進口之多少以爲

斷近數年來洋貨洋藥進口價值每歲多於土貨出口價值者約二千萬兩若再聽其耗漏以後斷不可支現在洋貨洋藥之來源無可杜遏惟有設法多出土貨多銷土貨以救之此乃王道養民立國之本源並非西商爭利會計之小數中國物產之盛甲於五洲然腹地與區工艱運貴其生不蕃其用不廣且土貨率皆質粗價廉非多不利非速不多非用機器化學不能變粗賤爲精良化無用爲有用苟有鐵路則機器可入笨貨可出本輕費省土貨旺銷則可大減出口釐稅以鼓舞之於是山鄉邊郡之產悉可致諸江岸海隅而流行於九洲

四瀛之外銷路暢則利商製造繁則利工山農澤農之
種植牧豎女紅之所成皆可行遠得價則利農內開未
盡之地寶外收已虧之利權是鐵路之利首在利民民
之利既見而國之利因之利國之大端則徵兵轉餉是
矣方今強鄰環伺外患方殷內而沿海沿江外而遼東
三省秦隴沿邊回環何止萬里防不勝防費不勝費若
無輪車鐵路應援赴敵以靜待動安所得無數良將精
兵利礮巨餉而守之夫守國卽所以衛民故利國之與
利民實相表裏似宜先擇四達之衢首建幹路以爲經
營全局之計以立循序漸進之甚至津通一路其緩急

輕重之宜尙有宜加審察者請爲我 皇上縷晰陳之
查御史余聯沅等原奏或恐洋教之煽張或惜捐金以
資敵或以狡謀利啖爲懼或以人心風俗爲憂不知鐵
路不過行程迅速至洋人洋教之多少與此無涉造路
之鐵可用華產修路之工仍用民人洋匠薪工亦屬有
限洋廠勸造不過市僧圖攬貿易之故智此事似非別
藏禍心輪機與輪船電綫等確有利用之實不得謂之
淫巧凡此數端舉無足慮至所陳引敵失業二事業經
王大臣剖析詳盡自屬切中時宜惟津通密邇輦轂非
尋常散地可比以臣所聞俄德鐵路相接俄人則改寬

其軌道以限止德車德國鐵路之人都城者必穿行土
邦達礮壘而後得達柏林法國巴黎城外諸路皆有大
堡環護之卽英人與法接界處海底鐵路之議雖因工
艱而止亦由忱於法岸近峙自失海險之故是外國顧
念根本未嘗不慎重深嚴今大沽鐵路已至天津若再
開至通州不爲置兵築壘以扼要隘但恃臨時收車撤
軌之圖則備預似覺未密苟於中途多設堅臺巨礮以
爲之備則所費必在百萬以外籌款實屬不貲其當審
者一也查奎潤等摺內稱津通之民以車船行店負販
爲生者約六萬人一家五口已有三十萬人此項人數

本難確知然就極少計之仰食於此者總不下六七萬人粗貨舟行不能盡廢短車客店不能盡歇尙可安插其半其廢業者必有三萬餘人若鐵路既開其投效公司傭趁車站固必需轉移執事之人顧津通二百餘里地段不長中站停頓不過數處一切修路掃軌等役需人不能甚多據西人鐵路述略稱英地四萬里鐵路執事等衆需十六萬五千人以此爲準津通二百里僅需八百餘人加以各項販運夫役不能過三千人其鐵路左右鄰近鄉邑無甚巨鎮名區人貨赴集亦難甚旺多方安插終恐不敷蓋津通一段內近神京外近海口又

有倉場三者兼之故聞民苦其太多而地段又苦其太短其難於消納實與他處不同至於廬舍尙可給費遷移若墳墓多所毀遷亦恐不易設處其當審者二也或謂非常之舉難與圖始鐵路爲利便所在不得鰓鰓過慮致失事機顧查所以續辦津通者但爲養路計耳夫籌養路之需而度支轉益屯防之費恤公司之困而郊甸乃有無告之民利害相兼宜籌兩全之策其當審者三也又查西國鐵路每爲距遠水口陸行艱滯而設有無輪車利鈍懸絕故雖重費勞擾而不嫌今則潞河深通帆檣如織車驟馳驟經宿可至商旅驛遞爲益無多

權以西例此路尙非所亟其當審者四也至於徵兵一節誠於軍事有益然當今所憂者外患耳津沽爲京師門戶常屯重鎮在焉大沽有事後路援師早應厚集津門若待至天津郡城告急勢難再分都門之禁旅遠出赴援亦無從抽大沽山海關之防軍回師宿衛苟無此路亦無甚妨其當審者五也夫利不百而不興害雖隱而必慎旣非萬不得已之計卽宜防意外枝節之端設此路創造之時稍有紛擾則習常蹈故者益將執爲口實視爲畏途以後他處續造集股之官商必裹足疑沮之愚氓必有辭則鐵路之功終無由成而鐵路之效終

無由見矣記曰先其易者後其節目及其久也相說以解言舉事宜有次第也今津通一路關繫既重不便尤多此則鐵路中之節目也竊查翁同龢等請試行鐵路於邊地以便運兵徐會灃等請改設於德州濟甯就黃河故道墊路以便運漕均擬緩辦津通爲另闢一路之計但邊地偏遠無裨全局若於邊隅發端其效難見且非商旅輻輳之所則鐵路費無所出不足以自存德濟一路黃河岸闊沙鬆勉強椎築工費太鉅河流遷徙無定其鐵橋等事尤難時時改作似擬改之路尙非盡善臣愚以爲宜自京城外之盧溝橋起經行河南達於湖

北之漢口鎮此則鐵路之樞紐幹路之始基而中國大利之所萃也蓋豫鄂居天下之腹中原綰轂胥出其塗鐵路取道宜自保定正定磁州厯彰衛懷等府北岸在清化鎮以南一帶南岸在滎澤口以上擇黃河上游灘窄岸堅經流不改之處作橋以渡河則三晉之轍下於井陘關隴之驂交於洛口西北聲息刻期可通自河以南則由鄭許信陽驛路以抵漢口東引淮吳南通湘蜀萬里奔湊如川赴壑語其利便約有數事內處腹地不近海口無引敵之慮利一南北二千餘里原野廣莫編戶散處不如近郊之稠密一屋一墳易於勘避利二幹

路袤遠廠盛站多經路生理既繁緯路枝流必旺執鞭
之徒列肆之賈生計甚寬舍舊謀新決無失所利三以
一路控八九省之衝人貨輻輳貿易必旺將來汴洛荆
襄濟東淮泗經緯縱橫各省旁通四達不悖豈惟有養
路之資費實可裕無窮之餉源利四近畿有事三楚舊
部兩淮精兵電檄一傳不崇朝而雲集都下或內地偶
有土寇竊發發兵征討旬日立可盪平徵兵之道莫此
爲便利六中國鑛利惟煤鐵最有把握太行以北煤鐵
最旺而最精然質最重路最艱既有鐵路則輦機器以
開采用西法以煎鑛鑛產日多大開三晉之利源永塞

中華之厄漏利七海上用兵首慮梗漕東南漕米百餘萬石由鎮江輪船溯江而上三日而抵漢口又二日而達京城由盧溝橋運赴京倉道里與通州相等足以備河海之不虞闢飛輓之坦道而又省挑河剝運之浮糜較之東道王家營一路礙於黃河下流者辦理最有把握利人此路既成但有利便並無紛擾民受其益人習其事商覩其利將來集資推廣續造不至爲難兵民食貨無往而不宜公私行役轉運盜竊損失雨潦稍延虧耗蠹蝕之患不禁而自止關東隴右以次推行惟力是視二十年以後中國武備屹然改觀矣難者曰幹路之

利誠如此矣其如費鉅難成何則請以分段之法爲之
擬分自京至正定爲首段次至黃河北岸又次至信陽
州爲二三段次至漢口爲末段中原地勢平衍工力可
省若令承辦員匠核實摺節估計大約每里不過五六
千金一段不過四百萬內外合計四段之工須八年造
成則款亦八年分籌中國之大每年籌二百萬之款似
尙不至無策開辦之始先就首段估造俟本段工竣餘
段以次推廣其籌款之法除由鐵路公司照常招股外
應酌擇各省口岸較盛鹽課較旺之地分別由藩運兩
司關道轉發印票股單設法勸集集股多者股商及承

辦之員優予獎勵並准該公司按照前案借商款墊解以資周轉至購買鐵料取之海外則漏卮太多實爲非計查山西之鐵產自平定盂縣者可運致於獲鹿縣產自澤潞者可運致於清化鎮鐵軌非同船礮取材不在至精土煉之產雖遜洋鐵亦足濟用即使價值略貴幾微其財仍散在中國不宜斤斤計較應一面迅速於正定清化分置煉鐵機爐以供取用除首段動工參購洋料外其餘悉用土鐵以杜外耗庶幾施工有序而藏富在民總之津通之視豫鄂度地考工相去懸絕臣之爲是議者非敢有驚廣侈大之心實以置路於可開可不

開之區雖一節有所必惜展路於有利無害之域卽艱重亦所當爲擬請責成李鴻章仍令原派總辦鐵路各員督飭該公司熟籌全局擴充原議次第舉工臣議解迂愚謹遵按切時勢各抒所見之旨竭誠籌度詳切上陳伏候聖明裁度飭下海軍衙門通籌熟計采擇施行國計幸甚民生幸甚至該公司呈請試辦鐵路原案係自認接續至山海關此路通接關東誠爲要工應飭其照案修造未便聽其中道改圖壟斷罔利如必以養路賠累爲辭則此乃海防應辦之事無妨籌動官款或酌助官本或於目前該公司生理未旺之時暫行酌給津

貼養路經費以示體恤其商借洋債仍由該商自行清理似覺較爲簡便

旨留中欽此

慈禧端佑康頤昭豫莊誠壽恭欽獻皇太后懿旨前因籌議鐵路事宜諭令沿江沿海各督撫各抒所見以備采擇嗣據陸續覆奏詳加披閱其偏執成見不達時勢及另籌辦法尙未合宜者毋庸議外張之洞劉銘傳黃彭年所奏各有見地而張之洞所議自盧溝橋起經行河南達於湖北之漢口鎮劃爲四段分作八年造辦等語尤爲詳盡此事爲自強要策必應

通籌天下全局海軍衙門原奏意在開拓風氣次第推行本不限定津通一路但冀有益於國無損於民定一至當不易之策即可毅然興辦毋庸等室道謀著總理海軍事務衙門卽就張之洞所奏各節詳細覈議奏明請旨張之洞劉銘傳黃彭年摺各一件均著鈔給閱看欽此

出省查勘西北兩江圖基情形片

光緒十五年五月十五日

再上年冬間經臣疊次檄飭東西北三江凡有圖基各縣急趁冬晴水涸於向來卑薄去年被水處所修築完固并派員會同各屬文武員弁督率紳民籌發經費倡

率民捐爰速辦理務於春水未至之前一律歲事復於
本年春間籌款委員豫買應用之木椿竹纜篾摺等項
分儲水道總匯各縣以備緩急四月中旬省城連日大
雨各路漸次加漲臣慮新築沙土未實卽於四月二十
一日乘坐小輪出省親往履勘督催先溯北江轉過西
江仍由北江還省中途由青歧口入閩四會之綬江由
新興江口入閩肇慶府城外之支河由三洲口入閩高
明之支河由官山海口入閩南海之支河所有三水四
會高明高要鶴山南海等縣各大圍晝夜奔馳詳加查
勘凡沿江暨內河小輪可通之重要各處均登岸步行

察看此外沿岸各圍舟行可觀培築尙屬認真卽於二十六日回省現在圍內各田禾苗長發彌望青葱續據四會縣稟報四月底晝夜大雨五月初一日該縣上游廣西懷集縣暴漲驟下水長一丈有餘幸各圍基略有坍塌處所均經竭力保護無虞於初三日後水勢旋即消退若此後晴雨應時夏漲平緩西北兩江郡縣或可無意外之慮臣仍切飭員弁督率慎防以免疎虞殊批知道了欽此

限定出洋米數酌捐建倉積穀經費摺

光緒十五年七月初

三日

竊查內地米穀舊例本禁出洋無如粵省商民常恃澳門爲淵藪借自運租穀爲名蒙混走漏關役吏胥得其規費輒聽漏逸數十年來相沿已久迭經臣查拏懲辦而仍未能禁絕再四訪查推求其故緣外洋貿易之人什九皆係粵產計粵民出洋者不下數十萬外邦水土異宜飲食不慣必須購食本省最上一種之油黏白米始免疾病是以出洋米穀得價最重而越南暹羅等處洋米貨色稍次者每年販運入口約在一千萬石內外粵民率用賤值購食洋米轉將內地上米販運出洋以圖厚利若概行嚴禁不特外洋華商本屬粵民僑寓遠

邦固未便斷其接濟且粵省內地農民以貴易賤以少易多自食之外尙可略沾餘潤一旦不令周轉於小民生計並未受益轉致有拂商情多方影射偷漏查禁終無實際然聽其由澳門轉運漫無限制又恐日運日多外洋多一銷路卽內地少一儲蓄亦非經久備荒之道當經飭令廣州府督同南海番禺兩縣會同九龍拱北兩關委員體察輿情悉心籌議茲據稟稱粵米出洋勢難全禁未免有名無實不若查明外洋粵商食米確數明定限制前數年約每年出洋百萬石上下以出洋米石最少之年計之亦在五十萬石以外請卽以五十萬

石爲限儻遇多運卽行禁止歲或偶歉雖不滿數亦卽停減此項出洋之米並擬每石酌令捐銀一錢穀石減半由九龍拱北兩關代收每年約可收銀四五萬兩此乃粵米出洋商民所捐之款卽爲粵民建倉積穀備修田園以爲根本之計等情臣查粵省米穀出洋實係專濟粵民今昔情形過然不同且外洋各國多食麥麵惟東西各洋食米而越南暹羅卽係南洋地方產米最多且以其餘分販粵省是外洋之無須華米甚明其爲出洋粵民自行買食尙屬可信今旣未能全禁出洋自當籌一妥善之策以期推行盡利於內外商民兩無窒礙

且每年進口之米約在一千萬石而出洋之米只准五十萬石計所出之數僅當所入二十分之一於民食似無虧損且可稽察確數酌予限制隨時消息該府縣暨委員等所籌各節均係實在情形自應照議舉辦所捐經費因稽查出洋米穀而起自以建倉積穀爲先經臣飭局委員會同該府縣在於東關西關內外選擇善地各建一倉在東者擬名之曰廣豐東倉在西者擬名之曰廣豐西倉按年以銀四萬兩買穀存儲有餘留爲備修田園之用粵省卑溼穀不耐久兩倉擬共儲穀十萬石爲率收足卽存銀備用仍三年糶換一次所有倉穀

收放各事遴選公正紳士經營並派監倉委員稽查由督糧道督飭員紳妥協經理不由吏胥經手以杜流弊至澳門商民向係仰食粵米該商民等同係中國赤子不忍視同化外每出洋米穀百石准其多帶二十石以爲澳門民食華米免捐倉穀銀兩此項乃米商捐助專備本省積穀係屬民捐民用並非抽收稅釐官董其事而不用其款商出其資而民收其益仍視年歲豐歉以爲權衡實於粵省根本之計大有裨益

硃批戶部知道欽此

修築珠江隄岸摺

光緒十五年七月初三日

竊照廣東省城南臨珠江亦稱省河承西北兩江之下
游歷年以來省河北岸官地民間逐漸侵占填築與水
爭地淤停日多每逢異漲西關南關一帶皆苦水患蓋
白洋人在省城外西南隅當白鵝潭之口建築沙面廣
造洋房不特地勢高整界畫分明而石隄陡峻江流湍
急力能刷沙致淤沙停積多在上下游水緩之處其沙
面以上以下沿江一帶私占民地屋宇參差瓦礫蕪穢
雜投淤積無從禁阻潮退以後皆成泥灘近年地方豪
族往往明目張膽填築河身蓋造房屋動輒斗入河心
數十丈若不亟爲禁斷將來接踵效尤河身日窄三十

年後爲患何可勝言臣數年以來蒿目民間博采衆論督同司道府縣悉心籌議僉以欲弭水患必先杜絕侵占欲杜侵占必須明示限制惟有在省河北岸堅築長隄整齊畫一增損均有所不能侵占填築之弊不禁自絕再於沙面南岸斜對之洲頭嘴地方適當西北江頂衝之處另闢一河以分水勢由鷄鴨濬經馬涌瑤頭諸村過省城之東五里至鴨塾關以下始歸入省河北支正流復將南岸鰲魚洲江面最窄素號阻水之處開掘寬通使上游江水之來既分其流復去其梗從容暢行西關南關繁富之區自無水患臣詳加籌度實爲當務

要圖不容少緩疊經臣親督委員周歷河道勘查地勢
南關自天字馬頭起東至東關東涌尾止西至沙面止
又越沙面之西舊名西礮臺西至橫沙止東西共長一
千八百丈有奇一律築成石隄東西地勢錯出不齊迤
東填築較寬迤西填築較窄總期於水勢無礙修成之
隄一律堅築馬路以便行車沿隄多種樹木以蔭行人
馬路以內通修鋪廊以便商民交易鋪廊以內廣修行
棧鱗列櫛比隄高一丈隄上共寬五丈二尺石礮厚三
尺隄幫一丈三尺馬路三丈鋪廊六尺其沙面以東粵
海大關之左現爲洋行香港輪渡馬頭擬於其右添設

丁字馬頭爲將來官設輪渡停泊之所並在沙面以西之橫沙地方爲招商局輪船建造馬頭一所以惠遠商西關沿河南自橫沙起北至增步止約長千餘丈舊有民間自築護田圍基一律加高培厚酌開小涌并設竇門旣防外漲兼洩後路自白雲山南來之內水統計西關南關一帶隄基馬頭及河南挑河之費約共需銀四十餘萬兩若分段填築所費尙不甚多今先從南關適中之天字馬頭築起中爲官輪大馬頭東西共接築一百二十丈以爲首段層列木椿入土丈餘隄外砌長方石塊縱橫十層高以一丈爲率石底鋪以紅毛泥石縫

攬以鐵錠石礪之內以土和灰沙春築堅實務令鞏固
平整於本年三月內興工八月內即可竣工迤東迤西
及西關一帶分爲十段接續推廣分派員匠照式興工
並多開小涌爲小艇避風之處約計兩年大致可以修
成其沿河新填私占之地段房屋應令其拆徙年久侵
占之戶但須清丈明白從寬免其追究房屋非有大礙
不令遷徙儻必須撤去其實係貧苦者酌給遷徙修屋
之費如有劣紳土豪從中把持抗阻漁利妨民卽行奏
請嚴懲惟此項修築經費若責令商民自辦築室道謀
集款不易若非官爲籌墊未易刻期觀成且分段計費

尙不爲多擬先由官暫行籌墊每一段修成之後卽隨時招令公正紳商承領新填地段繳還修築經費准其蓋造房屋西南兩關沿河均係商賈輻輳之區一聞准其繳價承領極爲樂從清還此項經費甚不爲難可以無須動用官款此後遞年地租馬頭各租卽以留備每年疏濬河道興修一切水利之用伏查廣州名邦素稱雄劇乃自洋人築成沙面隄岸堅固馬路寬平民居毗連之處街埠逼窄棚寮破碎不獨相形見絀商務受虧實非淺鮮且粵省通商三十年洋行輪渡久設馬頭而省河之內我之官輪兵輪以及招商局商輪並無馬頭

一處不獨上下不便亦於體制有關一經修築隄岸街
衢廣潔樹木葱茂形勢遠出其上而市房整齊馬頭便
利氣象一新商務自必日見興起且粵省米穀均在花
埭離城甚遠城廂內外湫隘又無可儲糧之地所有沿
隄行店應卽多修米棧以便屯積緩急便可恃以無恐
水患既息商利亦興實爲粵省商民久大無窮之利此
項工費隨墊隨還不動庫款應請毋庸造冊報銷
硃批該部知道欽此

籌建槍礮廠摺

光緒十五年七月初七日

竊廣東地方邊防海防胥關緊要槍礮一項最爲急需

臣於光緒十三年五月內奏明建設槍彈廠購買機器
兩副鑄造毛瑟馬梯呢士乃得雲者士得四種槍彈祇
以爲經費所限故僅得小試其端查水陸各軍需用槍
礮概係購自外洋不但耗蝕中國財用漏卮難塞且訂
購需時運送遙遠辦理諸多周折設遇緩急則洋埠禁
售敵船封口更有無處可購無處可運之慮況所購之
械種式不一精粗各別彈碼各異倉卒尤易誤事詳籌
時勢必須設廠自鑄槍礮方免受制於人庶爲自強持
久之計惟廣東司局各庫經費有常京協各項數倍他
省加以本省餉需浩繁萬分竭蹶實無餘力兼籌此舉

當查光緒十二年間會據文武官紳暨鹽埠各商分年捐資以三年爲率約集銀八十萬兩在福建船廠及本省分造甲乙至壬癸兵輪十號並購配礮械均經奏准辦理有案計自光緒十二年起至十四年底止業已三年期滿所有捐款陸續繳齊因復督同司道將領籌議擬將前項捐款接續勸辦以作開設槍礮廠專款各紳商以款鉅力絀頗形觀望復經竭力開導始允自光緒十五年起扣至十七年底止續捐三年指定專充購買鑄造機器並建造廠屋經費總以足敷開廠之用爲度查後膛新式單響連響各洋槍如馬梯呢毛瑟哈乞開

司黎意等名目以及次等舊式洋槍不下一二十種各省從前陸續添購或倉卒取辦往往兼收並蓄不甚擇別以致分給軍營槍式多有參差現既設廠自造自宜仿照西國軍制擇定一式使弁兵專意操演器與人習臨戰更資得力綜計諸式中惟德國之毛瑟槍各軍購用最多於號碼近遠機簧裝卸較爲諳熟槍之退力較馬梯呢稍輕後膛機簧則視哈乞開司黎意等槍較爲樸實耐用德之陸軍冠於各國以此特爲利器近又訪知該國照單響毛瑟槍式改造連珠十響軍中一律換用實爲最新最精之式至純鋼後膛礮位向推德國之

克虜伯英國之阿模士莊兩種爲最精而克虜伯廠以泥罐煉鋼後膛橫門堅固尤出其右該廠口徑十五生以上大礮造法深奧經費太鉅目前未可猝辦至所製十二生以內過山礮式運載輕便利於陸戰近日洋戰步隊專恃礮隊爲前驅亟宜先行仿造以立初基以上槍礮兩式均經臣詳切考究確可採用惟連珠毛瑟槍德國官廠自造其式尙未傳播克虜伯礮專以出售不肯爲他國代造所有一切機模無從覓致未免臨淵徒羨臣又訪知柏林地方力拂機器廠於該國槍礮模式常有承造情形最熟因電託出使德國大臣洪鈞與之

商詢購鑄造新式連珠毛瑟槍及造克虜伯過山礮各項機器全副其汽機馬力加大以便槍礮兼造鍋爐併爲一廠較得節省旋接洪鈞覆稱該廠應允能辦因與訂定造槍機器一分每日能成新式連珠十響槍五十枝汽機馬力一百二十匹又造礮機器一分每年能成克虜伯口徑七生半至十二生過山礮五十尊共淨價一百五十一萬七千七百六十馬又添購槍尾尖刀機器全副淨價八萬一千四百八十三馬共合銀三十餘萬兩十一箇月成交此事係由外籌捐不請獎叙並非動支庫款經費惟關繫海防重務遵經咨請海軍衙門

核示現承准覆稱廣東捐款開廠鑄造軍械並未動支
帑項尙屬妥善自應照准等因在案昨已付匯定銀安
立合同繪就廠圖寄粵此外購地設廠造屋約需銀數
萬兩現經擇得距省西北四十餘里石門地方後依山
麓前臨北江地勢深奧近內水運亦復利便於建廠甚
爲相宜當卽派員經理按照洋圖刻日庀料興工其槍
管鋼料及罐煉礮鋼俟開鑄伊邇暫向德國名廠購備
以期精良適用此擇式仿造槍礮之擬辦情形也竊惟
外洋槍礮造法日變日新近今益臻精絕淵源奧變本
屬不易窺尋向來辦理皆患製造之難而利其可以購

獲遂致相率因循未遑變計各省雖經試造林明敦槍及阿模士莊小礮但槍式既舊礮式尙非精品且偶一仿造非專廠開鑄規模未見恢拓於中國風氣尙難振作臣此次興辦幸廣東官商黽勉急公續捐鉅貲不動庫款於非常拮据之中得有措手是以不憚委曲繁重銳意舉行將來擬卽以雜式年久等槍發給腹地綠營緝捕團勇而以新式快槍專給精兵勁旅彈壓邊海要地當可使水陸軍容肅然改觀若經費充裕成槍迅速不獨廣東軍營取給不窮並可協濟各省至過山礮一項若能製造精熟則臺礮船礮亦可次第擴製以收大

效尤盼鐵鑛各山采煉得法日旺日精數年之後鋼料鐵料悉取內地則尤度支無形之利矣一俟機器運到廠屋落成開爐鑄造當再將各項工費鑄造情形詳晰奏聞

硃批該衙門知道欽此

開鑄制錢及行用情形摺

光緒十五年八月初六日

竊照光緒十三年三月初五日奉上諭戶部奏遵議張之洞奏廣東購辦機器試鑄制錢銀元並擬令督辦鑛務大臣兼理瀘州鑄錢事宜各一摺覽奏均悉現議規復制錢必應廣籌鼓鑄變通辦理以輔各局之不足張

之洞擬於廣東購用機器鑄造制錢自係因地制宜之策惟創辦之始應將工本一切確切估計方免將來掣肘該督摺內始稱價本及火耗等項與鑄成所值銀數不致虧折又有目前粵鑄兼用中外銅鉛虧折過鉅等語究竟鑄錢一千所值銀數有無虧折仍著詳細核算據實覆奏至所奏兼鑄銀元一節事關創始尙須詳慎籌畫未便率爾興辦著聽候諭旨遵行該督摺內所稱弛禁商人酌議挪借究係何項商人並著明晰具奏等因欽此查機器鑄錢事屬創始一切價本火耗工費非開鑄之後無從核計準數故一時未能覆奏此項機器

於光緒十三年四月間由使英大臣劉瑞芬向英國喜頓廠定購訂期十八箇月造成分三批運粵至上年十二月底一律到齊當經委派候選道蔡錫勇江蘇知縣薛培格籌度建廠鑄造其廠屋先經擇地於東門外一里之黃華塘買地八十二畝有奇貼近東濠加開寬深便於轉運照圖建廠至本年二月間廠屋落成所有機器亦陸續安設齊備於四月二十六日開爐試鑄先將日本紫銅六成參配英國白鉛四成鎔成扁塊再用火烘熱以機輪輾成銅片次用機器軋出方孔錢胚搖洗磨光然後印字成錢計展轉十餘手無一不取資於機

器其運動健捷勻準實非人力所能及故所成之錢輪廓光潔字體精好私鑄斷難仿效謹將錢樣一千枚分裝二匣恭呈御覽論機器全副之力每日能造錢二千六百緡惟開鑄之初人與器不相習洋匠僅有四名分教未能徧及開用機器不及十分之一每日成錢不過百餘緡邇來匠徒所學漸臻純熟添募工匠加開機器日下每日已能成錢五百緡再過數月逐漸增多至於機器全開每日即可成錢二千餘緡此開局後數月以來鑄錢之大略情形也至核計工本火耗一節此時機器尙未全開工匠亦未募足而且諸少熟手本難遽定

確數大約就粵省已買之銅鉛價值核算每日成錢在千緡以上則可免於虧折若在千緡以下則遞有些微虧耗將來匠徒日習日熟如能日鑄二千緡以上則可有盈無絀卽銅價稍長亦尙無妨蓋發軔雖藉馬力成物則在機器如馬力可動機器十座今只用其五馬力減用其半則煤火虛耗一倍矣諸如此類莫得準數故必盡機器之力量始可定火耗之多寡今就每日成錢五百緡計之洋匠每七日休息一日一月作工二十五日得制錢一萬二千五百緡每錢一文重庫平一錢每千文重一百兩折合六斤四兩內配銅六成鉛四成洋

銅每百斤值銀十一兩七錢二分洋鉛每百斤值銀五兩五錢連傾鎔火耗共用銅四萬八千零四十七斤值銀五千六百三十餘兩用鉛三萬三千九百八十四斤值銀一千八百七十兩合計銅鉛價本火耗合共銀約七千五百餘兩煤炭泥罐鋼模約銀二千六百四十餘兩委員司事華洋匠役薪工各費約銀二千七百餘兩總計銅鉛價本工火等費每一月約需銀一萬三千兩鑄成制錢一萬二千五百緡若以銀一兩易錢一千文計之尙不敷銀數百兩此指日鑄五百緡而言若同此匠役人數而技藝純熟一日可鑄千緡一月以作工二

十五日計之可鑄錢二萬五千緡核計價本工費約二萬四五千兩便可敷用是則不至於虧折矣此核計價本工費之大略情形也溯當光緒十三年臣購辦機器之初東洋銅價頗平今雖洋銅頓長然較之滇銅價仍懸殊故前奏稱用上等洋銅洋鉛價本火耗不致虧折若兼中外銅鉛則虧折必鉅查粵省滇銅甚少並無準價白者珍貴過甚只可製器不能鑄錢紅者每百斤二十四兩貴於洋銅已將一倍雖質比洋銅爲佳而虧折過鉅此外則有內地舊銅廢銅每百斤價十二兩搜買既屬無多銅質又復不淨難受機器軋力雖經提煉仍

易酥裂不足以充鼓鑄以故目前未能兼用滇銅應俟滇省鑛務辦有起色銅價大減再行商定銅價運費采辦參用雖少有虧折究屬以中國之銀易中國之銅其利不至外溢即使以後洋銅之價漸平年年漏卮亦非長策此則鑛務之不可不亟圖鼓舞振興者也自開局至今已鑄成制錢二萬餘緡應卽定價行用臣督飭東藩司游智開道員蔡錫勇等詳加核議現定爲每錢一千值銀一兩百文值銀一錢十文值銀一分一文值銀一釐整齊畫一無論官民收支出入皆準此數永無增減每百每貫皆係足陌收發皆不准扣底減數先行搭

放官項每月善後局支發薪糧公費采辦雜支等項均
定搭放二成至本省現開鄭工捐局振捐局凡報捐者
准以新錢上兌由司局自行以應發銀款通融抵收將
來解部時仍按定例銀數起解一切釐稅捐款繳官之
項均准搭交出入均照每錢一千作銀一兩官發只搭
二成官收則自二成以上以至全用新錢抵銀交納者
聽不限成數意在發從少而收從多官先貴而民自重
至新錢雖經通行其市面舊錢仍准照舊行用嚴禁奸
商藉端擡舊錢之價以免物價增昂軍民受累至行用
新錢除發給藩運兩司官銀店承領行銷外其餘省城

各銀店俱准取保赴錢局領回存店代銷民間如願以銀易錢者卽赴各銀店按每千一兩之定價兌換如願以新錢易銀者准赴官錢局亦按每千一兩之定價兌換私鑄私銷照例嚴禁總之每錢一分質重一錢值銀一釐以示簡出入同價以示平價值永無增減以示定有發有收以示通准赴官局換銀以示信市錢不禁以示自然業由司局出示曉諭於八月初三日開用民間以新錢銖兩齊一質文俱精莫不先覩爲快各處銀店爭來局領回發兌城鄉商民俱遵照定價交易貨物行用尙屬暢利市面並無紛擾此定價開用新錢之大略

情形也現計購置鑄錢機器全副並附鑄造銀元大號
機器四架及鑄刻各種網模共價值運腳保險費銀三
十一萬五千餘兩購買民地建造廠屋局房橋道並開
濬河濠水池安放機爐製辦器具雜物共用工料價銀
一十四萬六千餘兩至前奏所稱與弛禁商人代向富
商挪借應用卽指誠信敬忠兩堂截緝闖姓之商人而
言此項借款係屬暫時挪移已由善後局陸續籌款歸
還

硃批覽奏均悉各省錢樣向有成式該省鑄錢應用清
文寶廣二字並不必添鑄庫平一錢字樣該部知道欽

此

張文襄公全集卷二十五終

紹興孫家棟校

張文襄公全集卷二十六

奏議二十六

洋商附鑄銀元請旨開辦摺

光緒十五年八月初六日

竊臣於光緒十三年正月二十四日具奏粵省購辦機器試鑄制錢擬請附鑄銀元一片於三月二十七日接准戶部咨奉上諭所陳兼鑄銀元一節事關創始尙須詳慎籌畫未便率爾興辦著聽候諭旨遵行等因欽此經臣欽遵在案現在制錢甫經開鑄一切辦理情形業已另摺陳明所有銀元遵旨尙未開鑄茲有香港英商匯豐洋行因前數年籌借洋款與中國時有交易前月

遣人至海防善後局面商聞粵省欲鑄銀元該行有英國輪墩及美國舊金山所出款銀每條約重一千兩成色較中國紋銀稍高欲求代爲附鑄按月陸續交來多則十餘萬兩少亦四五萬兩鑄成後願在中國各口一體行用每鑄銀百元補工火銀一元並送來條銀四條請爲試鑄經海防善後局司道稟商到臣伏查粵省除藩司地丁部款運司鹽引正課海關稅項均用紋銀投納外其餘運庫雜款各府廠釐金捐項租息一切雜款及善後局支發各項率皆通用洋鑄銀錢至民間所用則更全係洋錢此等情形不獨粵省爲然如臣前摺所

稱閩臺江浙皖桂等十餘省大率相同是外國洋錢之行銷日多一日卽中國紋銀之漏卮日甚一日此已爲中外所共知無俟微臣之贅述至匯豐爲英國著名之銀行在中國口岸生意繁多遠勝他行其意因中國南方各省多用洋錢外國所來之銀條不便散碎使用欲自在香港開鑄則購辦機器置造廠屋所費不貲欲在外国鑄就運來則中國近來通用之洋錢大半皆係墨西哥國所鑄條銀所出之地與洋錢所鑄之地相去太遠運費甚多不如粵省與香港相距咫尺朝發夕至便於往來可以節省費用且以中國所鑄之銀錢行用於

中國理勢既順獲利自饒此匯豐洋行情願鑄用中國銀元之實在情形也前准戶部來咨本擬請旨允准試辦惟原咨令將部臣所陳四弊預籌杜絕慎選賢員切實經理終始如一以期推行盡利並云目擊時艱亦思與鑄銀錢權衡國用是部臣之意實以試鑄銀元爲可行且擬准粵省試辦惟與利必先防弊自係慎重銀幣之意臣查部臣原奏謂中國之銀出洋者多一旦聚以鑄幣恐致價貴源涸查現在粵省試鑄銀元其銀條取諸匯豐乃係來自外國即使匯豐條銀或有短絀亦可向別家洋行購買於中國原有紋銀並無銷耗且可使

外洋紋銀充物中華則源涸之弊無矣部臣又恐鑪匠
攙和小民銷翦查攙和之弊最易辨識聞聲辨色皆可
不爽局員詳備監察衆多只在經理得宜章程周密所
謂慎選賢員卽無此弊至小民私銷一節查此事銷燬
無利保其必無旣無機廠亦難私鑄小民私翦一節查
銀元上鑄明重幾錢幾分輪廓花紋均極精緻若稍有
虧缺輕小真偽顯然較之內地向用各種化寶松江銀
錠方圓厚薄參差不齊者銀店尤易辨別再查粵省所
用洋銀率皆椎鑿日久破壞爛板現在誠不免有翦碎
使用之事今官局擬鑄銀元並擬照外洋通例兼鑄每

元二開五開十開二十開之小銀元以便民用亦鑄明
分兩輕重民間交易卽一錢數分之微可以小銀元搭
用無須等平可免紛爭既可零用何須私剪則攬和私
剪之弊無矣部臣又慮鎔化銷折官帑有虧臣細加考
核如銀元大小兼鑄核計成本足可通融抵補不致有
虧至匯豐附鑄之銀元已議定酌補工火將來贏則多
鑄歉則少鑄操縱因時則銷折虧帑之弊無矣部臣又
慮銀色太低減成取利用必不暢臣查中國所用之洋
錢從前各國皆有近則墨西哥國所鑄盛行臣飭通曉
化學之洋匠將各種洋錢逐加化驗大率得銀九錢不

相上下始知從前有謂只七成者其說不實至各國所鑄小洋錢通例皆逐次遞減成色最少者亦有八成左右今粵省擬鑄銀元意取中外流通其大銀元定用九成小銀元由八成六遞減至八成爲止色雖稍遜工費較多其實成本仍係一律總期較之外洋所鑄成色相符或且稍勝民間自無異說斷不肯任意減成以致自相窒礙則減成不暢之弊無矣至部臣謂廣東省銀元鑄成後稅釐雜項均准搭收各省協款應查明受協各省向用銀元與否分別辦理一節臣查粵省擬議原係解部各項仍用紋銀向用洋錢省分乃以新鑄銀元搭

解與部議正復相同伏查部臣所慮四弊臣俱已熟慮周防並無窒礙然臣所謂此事之有益者猶不在此泰西各國率皆自鑄金銀各幣自相寶貴不用別國之錢中國乃用各國錯雜所鑄之銀錢甚至黝黑破碎不可辨識而民間爭相行用其於體制實有所關傳云惟器與名不可以假人今遠人慕化欲用中國所鑄之銀元其文曰光緒元寶如推行漸廣不特中國各口岸卽越南暹羅南洋各島均可用中國之銀元各該處華民甚多其心皆有所維繫是此事實大有裨於國體至利析錙銖抑其末也惟洋錢每元向重七錢二分臣前奏因

中國之銀中國所用故擬定爲庫平七錢三分茲據匯豐洋行聲稱仍擬鑄七錢二分則與向有洋錢一律便於交易竊思既欲中外通行自宜俯順商情仍以七錢二分爲率至附鑄之小銀元亦照此遞爲差減民間向來以此爲便現今省內省外市面觸處皆是自可行銷無滯總之此事臣再三籌度可發可收似屬有利無弊合無仰懇天恩准照部臣前議由粵省開鑄試辦卽由戶部行知各省凡向用洋錢各省關一律通行准其與洋錢一體完納華洋釐稅并各項雜款一切捐項其官商軍民或用中國銀元或用洋鑄銀錢隨宜通用聽其

自便粵省所鑄之銀元刻縷精工成色有准較之東洋銀錢過無不及商民既肯用洋鑄之銀錢豈有轉不願用中國自鑄銀元之理且並不禁外國之洋錢又不強其必用官鑄之銀元於市面民情兩無紛擾至向用洋錢各省藩庫關庫所收之項其向用紋銀投納者儻有用新鑄銀元交納應准其仍照各該省行用洋錢向章補繳紋水於經制之款亦屬毫無窒礙

謹將廣東錢局試鑄銀元式樣大小五種分裝兩匣開單恭呈御覽

計開一號銀元十枚

每枚重庫平七錢三分

現擬改爲七錢二分 一號銀元

十枚每枚重庫平三錢六分五釐現擬改爲三錢六分三號銀元十枚每枚重庫平一

錢四分六釐現擬改爲四號銀元十枚每枚重庫平七分

爲一錢四分四釐分二釐五號銀元十枚每枚重庫平三分六釐五毫現擬改爲三分六釐以上大

小銀元分兩係照光緒十三年原奏每元重七錢三分

依次遞減今因匯豐洋行商請附鑄擬改爲每元重七

錢二分二號以次按照遞減以順商情

硃批戶部議奏單併發欽此

擬設織布局摺光緒十五年八月初六日

竊自中外通商以來中國之財溢於外洋者洋藥而外莫如洋布洋紗洋紗縷細且長織成布幅廣闊較之士

布一匹可抵數匹之用紡紗染紗軋花提花悉用機器一夫可抵百夫之力工省價廉銷售日廣考之通商貿易冊布毛布三項年盛一年不惟衣土布者漸稀卽織土布者亦買洋紗充用光緒十四年銷銀將及五千萬兩查洋藥一項中國向有絲茶兩宗足以相抵近則日本印度意大里等國起而爭利徧植茶桑所出幾與中國相埒華貨因之滯銷是絲茶本爲中國獨擅之利今已成爲共分之利棉布本爲中國自有之利自有洋布洋紗反爲外洋獨擅之利耕織交病民生日蹙再過十年何堪設想今旣不能禁其不來惟有購備機器紡花

織布自擴其工商之利以保利權第近年以來中國殷商大賈屢有議及此者徒以資本難集心志不齊迄今尙無成效臣督同善後局司道詳籌熟商擬在廣東省城開設織布官局官爲商倡先行籌款墊辦以應急需俟辦有規模再陸續招集商股當卽電致出使英國大臣新授廣東巡撫劉瑞芬考究機器價值及建廠設局辦法又查洋製之布式樣衆多難以徧效現擇中國最爲通行之布樣七種曰原色扣布一種曰原色布上次二種曰白色布上次二種曰斜紋布一種曰提花色布一種各取布樣附同棉花寄交英廠以便照配織機依

式仿製嗣接劉瑞芬電稱寄到棉花經英廠考驗能織原色扣布斜紋布及原色次等布三種若織上等細布須參美國棉花各半紡成細紗方能合用臣查中國附近長江各省均產棉花以江南通州所產者爲最佳其次爲嘉定南翔之花又次爲浙江甯波及江南松江府屬之花雖非出自粵產然由上海運粵價脚甚廉且其利均在中國惟各花僅能成布三種若欲織成上項七種必須少參洋花查英法各國棉花必購之印度與美國皆非本土所產然織布紡紗獲利固已不貲今中國自有之棉花已能成布三種統計成布七種不過參用

洋花十分之三而工價較之外洋既賤成布即可出售
又省往返運費其獲利自當勝於洋人現計中國織布
商局僅有上海一處經營十餘年尙未就緒若粵省開
設官局營運有效再能推廣於沿江各省悉變洋布爲
土布工作之利日開則漏卮之害日減且洋布本非中
國所有雖用機器以代人工並非奪力作小民之利本
務長策無踰於此已於本年七月內訂購布機一千張
照配紡紗染紗軋花各項機器及汽爐鍋爐水管
汽管機軸等件共需價英金八萬四千八百三十二鎊
外加運腳保險以鎊價折合共需銀四十餘萬兩機器

分五次運粵十三箇月在輪墩交清計來年秋冬之間
可一律運到出布長短視紗縷粗細爲定照每匹二十
六鎊至三十二鎊者合算每機日可出布一匹建造廠
屋占地縱橫約八十丈除地基外工料約需銀十萬餘
兩廣東省城民居稠密無可設局之地擬在河南購買
墳築約需銀數萬兩華洋工匠薪工煤火等費現未開
局尙難預計應俟機器運到廠屋落成次第開工再將
各項工費織辦銷售情形詳晰奏聞以備考核且備他
省仿照開辦

硃批該衙門議奏欽此

商定稽查外國育嬰堂辦法摺

光緒十五年八月初六日

竊自通商以來外國教士在各口岸每設有育嬰堂收養嬰孩育成者固有其人而夭折者亦復不少在彼以行善圖名未必遽加殘害無如民間訛言易滋疑惑遇有嬰孩病故道聽塗說輒謂係剜眼剖心之所致展轉傳述激成衆怒因而焚毀教堂殺戮教士事變倉卒遂至一發難收類此之案不勝枚舉必須妥籌辦法庶足以釋羣疑而消隱患本年五月間據番禺縣民人陳至剛赴臬司衙門稟稱東門外淘金坑常有嬰孩尸首由法國育嬰堂昇往掩埋爲數甚多傳聞有剜眼剖心之

事雖未目擊究屬可疑難保無殘害情弊懇請查辦等語當經臬司王之春派委員弁帶同陳至剛在東門城緝獲挑尸之陳亞發一名並嬰尸七具卽交番禺縣訊據陳亞發供係教士育嬰堂收養病死昇往掩埋者一時觀者盈千累百勢甚洶涌共抱不平經番禺縣將尸身當衆驗明確係因病身死並無半點傷痕羣疑始釋陸續解散當令陳至剛具結完案無如粵省民情浮動謠言四起聲稱洋人殘害嬰孩鑿鑿有據必欲盡殺教士毀拆教堂而後甘心遍出匿名揭帖定於六月初八日集衆舉事各國領事紛紛照請保護調撥兵船以備

不虞臣當飭地方文武多方開導嚴密預防各員弁等竭力彈壓幸不致滋生事端民情漸就安謐臣當與法國署領事于雅樂妥商令教士將所設育嬰堂每日收養及病故嬰孩各若干名按月刊單具報每月由臣派員到該嬰堂查看一次如有育養未得其法或乳媪照顧不力隨時商令更改如有病故立即填寫報單報由管理育嬰堂委員親往驗明加蓋驗戳給還該嬰堂存據然後用棺木殮埋不得仍前用物包裹並擬就報單式樣照送法領事轉飭教士遵辦去後旋據覆稱所開各節至周且備均係永遠相安極好之長策自當一一遵

照辦理等語業已分別委員照章妥辦兩月以來極爲相安臣伏查外國教堂收養嬰孩最爲生事之媒大率總以殘害人命招人詬病一唱百和莫釋羣疑同治戊辰天津教堂一案幾至不可收拾此外各省因此致生枝節亦復不少此次粵省商定稽查辦法適得法領事于雅樂人頗明白解事一切就範風浪立平要在括其總綱而不豫其細事嚴其考核而不禁其收留在彼藉以明心迹在我卽以息浮言洵屬兩益之舉相應將此案原委暨以後商定辦法章程奏明並咨明總理衙門立案將來各省皆可相機援照仿行似於安民弭衅之

道不無裨益

硃批該衙門知道欽此

軍需善後各案請開單奏報免造細冊摺

光緒十五年八月

月初六日

竊查光緒九年法越生衅廣東實當南洋首衝海防戰守之需前督臣張樹聲回任併力經營倉卒多未就緒至光緒十年臣到任之初警報疊至事機緊迫帑藏空虛水無兵輪陸少巨礮分防四口遠顧海南舉凡增兵置械設險攔河以及添購水雷魚雷電綫軍火等事均爲事勢之所迫窮日夜之力取辦於一時加以欽遵諭

旨力任其難援閩援臺協滇協桂旣救鄰疆之急復謀規越之軍至於萃勤兩軍大舉出關餉需尤鉅海面掇而釐稅日虧餉饋急而羅掘俱罄軍火購之重洋而難到商款借之香港而彌艱百計籌措苦心搏節涓滴之餉源皆由臣省嗇搜集而來一出入莫不親加綜覈嚴杜虛糜力求實濟重賞以鼓勇士廣募以偵敵情兵氣奮揚倣備周密幸得疆境晏然四民不擾仰賴國家威福南關告捷強敵大挫款議遂成諸軍漸撤又值瓊州黎客爲患移師剿撫欽廉界務孔亟調勇籌防外患旣紓懲前毖後復籌集巨款廣購車礮及毛瑟精槍各

種軍火分給本省防營並奏明解濟近畿防軍暨海軍衙門轉撥東三省練兵之用又以購械外洋緩急終不足恃置辦機器仿造船礮勉爲自強經久之圖現在兵輪漸增臺礮略備水雷魚雷槍彈各局及水陸師學堂已有規模可觀此數年以來籌辦海防善後諸務用款之實在情形也綜計光緒九年起至光緒十四年底止約共用銀二千五百餘萬兩積年旣久合之爲數甚鉅分之則屬無多均經歷任司局大小各員公同覈支臣覆加覈定無一非明白顯著實用實支其間查出舊案中一二劣員稍涉侵漁皆經嚴參示儆從重追罰一洗

從前虛冒積習惟籌備海防事多創舉軍情瞬息百變
思慮所及但求無誤立即施行各項用款大半爲例章
所無餘如轉餉越南運械臺北海上封阻諸國牽制計
覓洋輪遠雇馱馬事當喫緊不免居奇類皆不惜重資
期以必濟其支數亦難與例章符合若必責以造具細
冊款目如例不獨各將領有所不能卽熟於例案者亦
無從措手若由各局員代爲按例改造亦實無此辦法
伏查同治三年以至光緒八年各省軍需用款多係開
單報銷其時羣寇盪平吏治整飭並未聞各省筭理度
支之司局各員任意浮冒各擁巨資光緒八年九月復

經欽奉上諭各省軍需用款歷年既久用款甚煩善後事宜名目尤多若必造具細冊與例脗合往往再三駁查稽延時日甚至遷就挪移串通囑託百弊叢生並有應行造報之案積久未辦轉不足以昭覈實所有光緒八年八月以前各省未經報銷之案著將收支款目分年分起開具簡明清單奏明存案免其造冊報銷等因欽此仰見聖明垂察於造冊報銷一切爲難情事實已燭照無遺旋因言者奏稱免造細冊外重內輕易滋流弊復經部臣覈議光緒九年正月以後各省軍需善後各款概令一律造冊報銷不准再有開單並行令各省

將兵數勇數餉數先行報部立案預爲覈銷根據在部
臣之意以爲預立案據覆覈各籍准駁分明向來書吏
需索刁難遲延積壓之弊可以一概捐除乃行之未久
而需索之弊仍不能除積壓稽延因循如舊蓋款目事
件最爲煩碎繳繞卽如此次部章戶部則議令工兵應
銷之案不必造入戶部冊內兵部則又令造送全冊工
部復令將兵勇實數專咨報部章程已難畫一至若兵
部須開兵勇花名起止轉運軍火斤重道里遠近工部
須開礮臺軍裝工料做法細冊尤爲煩瑣易起吹求或
款目不誤駁其月日或出入不誤駁其案據雖有精明

之堂司難窮吏胥之伎倆臣在山西巡撫任內曾將以上各弊奏陳不惜籌定飯銀以圖省事然飯銀之數有限其實近來各省辦理報銷聞不免於正款之外提存另款鉅數暗給書吏臣愚不知此項另款從何而出粵省財用如此艱難豈能辦此卽使有款可籌以實用實銷之款因恐書吏作奸而爲此請託之舉實非臣之所敢出也查光緒八年以前廣東善後海防兩案報銷已逾數年以循舊造報之案猶復往返行查迄未能准銷完案茲再益以六年新款多爲例章所無且須分年滾接造報前案未准後案復積年復一年清釐愈難款目

懸宕流弊滋多殊非慎重庫儲之道且戶部之意重在預立案據原奏內稱有籍可稽造冊能覈開單亦能覈無籍可考開單有弊造冊亦有弊是開單之與造冊不過繁簡之分初無出入之別粵省近年新支各款俱已遵章報部立案若必令造具細冊不過多增案牘冊籍如山徒使堂司各官閱不能閱算不能算而原冊細數斷難與例脗合往返駁查祇供書吏刁難之具展轉延壓永無了結臣督同海防善後局兼辦報銷事務司道詳加籌議惟有援照從前成案開單奏報免造細冊始克破除積習迅速清釐由該司道等具詳請奏前來臣

查此次廣東海防各口較他省爲衝繁事機較他省爲急迫收支各款半係籌自本省並非悉動庫儲亦非盡屬額收且用款半係購辦船械修造臺廠以爲久圖非如從前軍需多係勇丁口糧耗散卽歸烏有惟欲求實用實銷造報斷難如例一經挑駁覈准無期查光緒八年以前各省軍需善後銷案多半邀恩開單奏報部書無可藉手暗中裨益公款實非淺鮮粵省自籌諸款旣極艱難用項自力從覈實較之從前髮捻報銷各案慎重實爲過之合無仰懇天恩俯念粵省海防善後各案款積六年事關五省價少成例款多外籌舊案不結新

款難清准其援案將光緒九年起截至十四年底止廣東軍需善後收支各款開具簡明清單奏明存案暫免造冊報銷俾清積壓而重庫款如蒙俞允應請特旨飭遵出自逾格鴻恩其從前奏定每兩一釐之報銷飯銀自當隨案照數解部以資辦公斷不拖欠合計已及銀二萬五千餘兩此皆各營各局文武將士刻苦餘積而來爲數實已不少此後防務已定舊案已清用款較簡分年造報較易爲力自十五年以後防營勇糧及製造等事仍當遵照部章造冊報銷不敢援以爲例殊批該部議奏欽此

沙田發給部照片

光緒十五年八月初六日

再廣東遵旨查辦沙田升科經前撫臣奏請敕部頒發空白執照一萬張並將設局清查升科分別繳款換照章程奏明在案查廣州府屬沙田舊章其老沙已補升者均照番禺上則徵收銀米其新沙未經成熟者均完斤鹵輕則每畝約完銀四釐有奇不徵米凡老沙新沙各坦向俱祇發司照或由縣發給墾單便執爲管業之據今設局清查無論已升未升上則中則斤則自應一律換給部照俾資遵守惟此次戶部所發執照祇有上則中則兩起並無斤則之照各局委員每多拘泥遇有

熟坦畝遂謂無照可發議請停給臣查光緒十二年七月內請頒部照原奏聲明無論老沙新沙一律換給部照老沙無庸再丈按冊核給新沙清丈明確立時填給嗣後民間買賣過割以此爲憑仍分別上則中則升科起徵等語並無何項沙坦無庸發給部照之說且前次奏定章程聲明草白等坦酌減花息勘明後分別給照定則升科起徵是草白坦亦應給照尤爲明甚但未成熟未便遽發上則中則之照耳非謂斥則以下遂不發給部照也况草白水坦等項望影佔築尤易起爭豈可轉令私照管業留貽訟累且今日之新坦卽將來之熟

田一經給照則土名畝數業戶姓名承墾年月一一明晰俟五年升科之期戶不須另查田不須清丈業戶雖欲延匿而州縣有冊可憑祇須勘明成熟分別科則按戶加升豈不簡易扼要一勞永逸且本屆清丈勞費數年若於此次大舉清丈之後業戶仍無確實可信之部照執以爲憑必致成熟屆期重丈有擾換照有費胥吏得賄永不報升覬覦不息訟端不已葛藤懸宕撤局無期是使胥吏開一需索之門爲民間留無數未完之案當經嚴飭司局一律發給部照以示民信而清田額勒限今年年底將所領部照一萬張一律發竣如有不敷

再行奏請續發惟現領部照既無斥則等項名目若待另行請領未免往返需時除熟坦分別上則中則填照發給外應將未熟之草坦白坦水坦照章列入斥則一律發給部照於照內分晰註明令地名畝段花戶墾期一一有案可稽俟五年成熟補升之期按冊查勘未熟者仍其舊貫已熟者改注補升科則則賦既不匿民亦不擾實於清賦恤民均屬大有裨益再查新安縣向未報有沙田此次查出該縣沙田皆係鹹水沙坦遠遜香山東莞等處且併不及潮州應酌照前次奏明潮州府屬沙坦辦法酌量寬減以示體恤仍一律發給部照俾

免向隅

硃批戶部知道欽此

全瓊肅清彙獎出力員弁摺

光緒十五年八月初六日

竊臣於光緒十三年二月會同前撫臣吳大澂具奏續
勦陵萬黎匪首要就殲一摺欽奉硃批覽奏均悉所有
出力各員弁著俟全瓊肅清准其擇尤彙案奏保等因
欽此又於是年六月會奏攻克崖州南林老巢通籌善
後事宜一摺奉到硃批此次出力人員准其遵照前旨
擇尤保奏等因欽此迭經隨時恭錄咨行欽遵辦理各
在案查瓊州黎客各匪以次廓清前經奏明分別裁留

勇營責成雷瓊道朱采搜捕逸匪通籌善後上年二月據該道查悉陵水縣屬七弓地方伏莽未清尙有漏網之匪首黃那絲符琶娘盤踞山內當派總兵朱達陸游擊李渭培等督隊進攻連克匪寨六處擊斃悍匪數十名我軍員弁亦有傷亡朱達陸等會合兵團踰險深入三月初十日攻破什常村老巢生擒匪首黃那絲符琶娘等解府懲辦復經分兵搜捕五弓及崖州之過山弔羅等處拏獲首要王那東王拂記謝其青等黎客匪黨殲除略盡全瓊一律肅清一年以來各峒黎歧馴服絕無糾衆出擾之事自本年九月起先將瓊州鎮標兩營

改爲練軍兩營裁去防勇三營以後當查照奏案陸續
裁改現在瓊州黎境分設撫黎局八處各派委員一兩
人文武參用每局各募土勇一百名或數十名責令該
員等經管平決爭訟緝拏盜匪修路墾田設墟招商等
事嶺南一局南豐一局凡陽一局番嶺一局樂安一局
廖二弓一局茅地一局古振州一局皆係扼要之所卽
爲將來設官控制應增應移張本其新開各路近外者
暢行無阻近內者稍有水冲草沒之處已嚴飭各局隨
時巡查修理芟剔以免梗塞設立墟市數處商販漸集
如定安之荔支園陵水之閔安墟儋州之薄沙峒牙汪

村等處民黎食貨交易日多其各墟所設義學黎人子弟多有來附學者至伐木墾田開鑛三端前經奏明招商辦理現在陵萬崖州一帶木料已暢出十餘萬株商人集貲前往認辦者絡繹不絕瓊山之怡嶺塘昌化之大聘村臨高之番嘔等處地方開墾成田者數百畝至二三千畝不等昌化大豔山銅鑛銅苗最旺商人張廷鈞不惜工本開采甚力今年五月內正在得手將見大枝鑛苗之際山巖忽致傾塌阻塞龍口該商並無退沮現議另開口門但瘴癘惡毒工役多傷一時未能深入另勘得會同樂會交界之雙灘鉛鑛甚旺現已招商試

辦所有先後在事員弁冒瘴越險僵仆相繼歷久不移
實屬異常出力茲策案擇尤按照部章請獎由海防善
後局司道開具清單詳請撫奏前來臣覆加查核各員
弁或臨戰殲擒首要或率軍攻克堅巢已經兩次奏奉
恩旨准其保獎嗣後三年以來籌辦善後搜山破寨擒
匪安良開路設墟勘山興利均係深入瘴鄉備嘗艱苦
仰懇天恩俯准照獎以昭激勵除傷亡瘴故員弁附請
賜卹暨千把各弁咨部請獎外理合恭摺具陳伏祈聖
鑒

硃批該部議奏單併發欽此

請頒廣雅書院扁額摺

光緒十五年八月二十二

竊照廣東省會創建廣雅書院合課東西兩省諸生臣
於光緒十三年六月曾經奏明在案嗣經書院落成選
調兩省士子肄業其中嚴定學規慎防流弊分經史理
學經濟四門隨其性之所近而習之各立課程日記以
便考核兩省肄業生額定各百名人數衆多添設分教
四人分門講授至策勵品行考察勤惰院長實總其成
臣於公餘之暇間詣書院考業稽疑時加訓勉先之以
嚴辨義利課之以博約兼資大旨欲力救漢學宋學之
偏痛戒有文無行之弊兩年以來才俊輩出造就斐然

其餘亦多恪守院規不蹈陋習十年以後人才必大有可觀竊惟嶺海雄博本多秀傑之才近來華洋錯處事雜言詭習俗所移其志趣凡下者多存希圖倖獲之念其才智穎悟者或有歧於異學之憂臣設立書院之舉竊欲鼓舞士類維持世風上者闡明聖道砥厲名節博古通今明習時務期於體用兼備儲爲國家棟幹之材次者亦能圭璧飭躬恂恂鄉黨不染浮囂近利習氣足以淑身化俗士習旣善民風因之伏惟我朝崇儒重道列聖典學右文各省會書院多蒙發帑興修贍給諸生膏火江蘇之紫陽書院浙江之敷文崇文兩書院福建

之鰲峰書院均蒙 聖祖仁皇帝頒給御書扁額其江蘇福建之紫陽鰲峰兩書院重蒙 高宗純皇帝頒賜扁額同治年間福建創立正誼書院江蘇重建正誼紫陽兩書院復蒙 穆宗毅皇帝俯允疆臣之請頒發御書扁額欽 列聖宸翰之昭垂示多士訓行之正軌人文日盛厥有由來今粵東創建廣雅書院事同一律且兩省肄業人才尤多相應援案仰懇天恩頒發御書扁額一方垂範士林以正學術以勵儒修俾海隅邊徼之士得以瞻仰率由奮興鼓舞從此賢才蔚起經正民興皆涵濡聖澤於靡涯矣

硃批著照所請欽此

沙路設防籌定久計摺

光緒十五年八月二十二日

竊照廣東省河入虎門後至黃埔尾分爲南北兩支南支溯流經沙路至省城西南四里之白鵝潭北支較淺南支較深均爲經魚珠過城南亦至白鵝潭北支較淺南支較深均爲廣州口岸中外船隻出入必經之路光緒十年間海防戒嚴南北兩支分用船石橋樁兩道攔截南支沙路全行阻斷北支魚珠尙留口門十五丈以通舟楫自和局定後魚珠一支照常開通沙路一支爲粵防大局所關經臣於光緒十一年六月十二年二月先後奏請永不

宜開蓋欲藉所沈船石爲根令其挂淤生洲日久便多紆折淺阻以後全力專扼北支一路庶幾簡要易施乃洋人注意中國形勢各國使臣領事始則聯幫瀆請開此河道繼復藉口爲有礙行船之利經總理衙門與臣內外堅拒不予曲從數年以來費盡筆舌彼則百計圖維必求開通此路而後已臣深惟事勢各國皆以開河爲便將來終必藉端要求必須籌一開通而仍可防守之方乃爲盡善連年反覆籌思多方考究查外洋河道設險之法除礮臺水雷以外惟有排立品字鐵樁一法最有實際而無窒礙鐵樁林立深插沙底中留口門有

事趕卽堵塞其要在阻船而不阻水最爲無弊敵人雖用水雷不能驟然攻拔且較之堆石阻攔不免爲水浪衝倒漂散者尤勝疊經督飭洋務處通曉工作算法之員及水雷魚雷局各員弁探測河道籌定辦法擬在舊建木橋之外沈石築壩處徧樹鐵樁中間留口門十五丈旁立紅綠燈以爲標識以備無事時仍可行船有事時立卽封堵其法椿長數丈用螺絲接合其椿根亦有螺絲紋旋轉入於河底深可七八尺用品字式三椿紐合上加鐵蓋是爲一攢每攢相距約一丈分列內外兩排以大鐵練交加維繫備極穩固口門兩旁密樹鐵椿

作圓弧式以利水流視水之淺深定椿之長短使高與水面齊平除數年來旁岸新長沙淤水深不過數尺者毋庸樹椿外統共需用鐵椿一千零三十桿每桿長自三丈至七丈不等將配合接樁之法繪圖注說寄交德國著名鐵廠名哈爾噶爾脫詳加考校照式定造由使德大臣洪鈞與該廠議價共德銀五十七萬八千七百九十八馬扣減三釐約合銀十三萬四千餘兩於本年四月十五日訂定限十五箇月交清分作十批第一批四五箇月起運約計冬月可以抵粵以後按月陸續運到即可陸續興工並由該廠代募匠目一人來粵監工

經理接合訂樹約一年內可以安畢此工若成則河道可塞可開操縱在我於水道戰備兩無妨礙現辦係下椿兩層已足資遏敵戰守之用所費亦不甚多以後擬兩年加增一次向外添樹鐵椿兩層日引月長愈增愈密若遞加至十數層則河路永臻鞏固至樹立鐵椿新工各費約需萬餘金現未開辦無從預定確數應俟工竣之後核實開報統由海防善後經費項下支銷查本年二月承准總理衙門函開英德兩使同時照會要求各節共五事囑令酌議孰可通融允許蓋開通沙路卽其一端其西江添岸行輪內地租房屯貨兩節爲害甚

鉅關涉各省各口全局利害斷不可允必宜堅拒其聯
單不得加徵領單不宜偏枯兩事尙可允許已允代爲
切飭核辦至開河一節尙只關繫廣東一省臣其時已
經籌有設椿之策考明價值作法若照此布置卽開通
後亦尙不至險要全失當經電商總署以備分別准駁
在案現已一面次第舉辦我之守具旣備則彼族之請
開與否靜以聽之將來相機因應均不爲難
硃批該衙門知道欽此

請定獲盜獎勵章程摺

光緒十五年八月二十二日

竊照歷准吏部咨拏獲著名巨盜一名或斬梟斬決盜

犯五名以上俱照拏獲擒匪之例保奏又各省獲盜人員如係舉發巨案拏獲著名大盜勞績與戰功無異者奏請破格獎勵准其捐定應升官階各等語又歷准兵部咨除軍營戰功外概不准越級免補等語定章昭著本極允協詳明乃部中雖有此章而粵省屢次所保拏獲大盜無異戰功各員雖聲請從優無不以尋常勞績議駁揆諸粵省情形實有望礙伏查廣東盜匪素多近海地方爲甚近年情形尤有不同疊經臣奏明在案大率以香港澳門爲老巢各有頭目分立堂名遣人四出打單凡鄉鎮富商僻靜輒窺沙田業戶皆爲打單之所

及按時收取鉅貲名曰行水以重貲爲賄買洋界巡役
置備礮械撫恤夥黨傷亡等費餘始分贓其根蒂深穩
夥黨衆多與別處盜賊首夥臨時湊集得贓隨手耗散
有窩可緝有巢可破者其情事迥不相同雇船無從禁
軍火無從絕接濟無從斷加以海面遼闊內河紛歧每
一出掠無不結隊連艘船則置有大礮身則懷有連響
洋槍兵勇追捕冒死拒鬪有時盜雖被繫其在前弁勇
亦必身受多傷甚至立時殞命或動殺事主或放火延
燒或擄其子女海盜則動將全船商民溺斃良民受害
實堪髮指及合力尋蹤追捕則已遁歸港澳竄入一步

捕之無從擊之不可該匪等恃以無恐不啻形同叛逆
疊經臣嚴飭地方文武暨緝捕員弁多方截拏不惜厚
集兵力優懸重賞近年以來陸續平毀匪巢捕斬首要
不下數百名所有東江西江北江各府縣以及海北廉
欽海南瓊州之內地盜風大減商民安業從前一縣歲
出盜案百餘者今則每年不過數起或竟無一案凡係
近內地方無所牽制者似已均有實效惟廣州府及沿
海地方錮結已久迄未止息溯查粵盜素橫厯見前史
國朝奏牘言之極詳嘉慶十六年前督臣松筠於一年
之內捕斬盜匪一千六百餘名當時松筠奏定專條內

稱粵東盜案除尋常行劫僅止一二次夥衆不及四十人並無拜會及別項重情仍照例具題外如夥衆四十人以上或不及四十人而有拜會結盟拒傷事主奪犯傷差假冒職官或行劫三次以上或脫逃二三年後就獲各犯應斬決者均加梟示恭請王命先行正法等語經刑部纂入則例刊本通行在案夫夥衆雖不及四十已屬不少而以其僅劫一二次猶謂之尋常盜劫若在他省可謂駭人聽聞者矣立法如此之重懲辦如此之嚴而匪徒絕無警懼迨至亂後賊膽愈張在昔不過拒傷事主今則屢屢殺傷弁兵在昔不過奪犯傷差今則

已獲之盜公然由香港洋官行文索回在昔或行劫三次以上或脫逃二三年以爲重情今則首要之盜行劫百餘次漏網十餘年者有之在昔間有拜會結盟今則港澳通匪大率皆係三合會並且立有堂名如巨匪曾亞杰曾鱸魚全稱爲聯義堂李畝李安稱爲隆義堂王觀稱爲新隆義堂黃有成稱爲聯勝堂白曾亞杰被獲曾鱸魚全逃往洋界其黨復與黃有成合稱義勝堂之類是凶燄較昔尤甚至同治三年間前督臣毛鴻賓撫臣郭嵩燾等奏請將舉發巨案或拏獲著名大盜核其勞績與戰功無異者給與優獎並將盜犯仍照新章從

嚴懲辦業經部議奏准通行查其原奏所稱寇亂之興其原多起於劫盜得一捕盜之良吏亦足以稍遏亂萌又謂今日治盜有從嚴無從寬有速斷無久稽等語實於廣東情形深切著明今日港澳情形又非二十年前之比賄串洋巡厚募狀師多方抗庇凶狡愈甚捕獲愈難疊經臣奏明並函咨總署電致使英大臣與香港洋官籌商交犯之法始終偏執庇護未肯允從竊思廣東盜風甚於他省治盜專條重於他省獨於獲盜勞績仍與尋常無別似覺輕重失平在部臣意以爲捕盜無關大局不過尋常兵差捕快之所優爲故不許其比照戰

功殊不知廣東盜賊每與官兵拒戰當其肆劫之時礮火震地兵勇團練聞警奔赴或圍或追賊黨槍礮橫飛當者立殞若非弁勇多人致死格鬪鮮能就獲故凡獲數盜我軍必有傷亡核其情形實與打仗無異較之他省緝盜零星掩捕恃重無虞者其難易何啻霄壤此等情形中外人人皆知若以此項勞績視爲尋常則臨事孰肯爭先效命查部章所謂尋常勞績者大率補缺後以何官補用及加銜而已今日候補武弁盈千累百老死未必有補缺之期若已有加銜以後卽無進步副將以上不能保越級不能保免補本班不能保翎枝不能

保先揆頂戴不能保甚至儘先字樣亦被駁改舊制千把歸外省拔補者亦新立補缺後名目所有遷擢褒榮之實際無一焉是其意專在裁抑獎案而已夫各省現無軍務之時各營將弁正宜設法以練其膽力考其才技卽隱儲他日邊疆戰守之才不於緝捕取之於何取之若但觀其操故套之陣法供塘汛之例差以爲殿最豈足以得人才乎厯考本朝名臣文如姚啟聖于成龍胡林翼武如藍廷珍李長庚關天培等皆由捕盜知名大用是此事實可以識拔人才臣於捕盜員弁嚴檄督責多方激勵及至請獎之時輒爲部議所格有罰無賞

但託空言孰爲用命今以向有比照軍營戰功比照拏獲擒匪之定章明文者反從駁斥是不惟不能破格獎勵且並部定多年之常格而亦廢之誠恐士氣愈墮盜風愈熾再過數年將爲地方大患且例章者或因廷臣之條陳或經部臣之奏定本係因時制宜並非一成不易惟有籲懇天恩廣東內河外海等處遇有拏獲著名盜首或拏獲大夥盜匪多名或迭次拏獲盜匪積至二十名以上核其勞績與戰功無異者無論文武准將獲盜之員照軍營異常勞績從優保獎以示鼓勵臣爲綏靖海疆激勵人材起見如蒙俞允仰懇特旨准行出自

逾格鴻施事關地方亂萌民生鉅害不敢不懇切瀝陳
臣不勝惶悚待命之至

硃批該部議奏欽此

派員查辦猺匪片

光緒十五年八月二十二日

再廣東連山廳猺排踞五嶺之脊界連粵湘桂三省深山重谷羣猺恃險負固屢作不靖自道光十二年勦辦以後漸就安戢近二十年來其頑悍之猺排故態復萌每每出巢劫擄焚殺民村亦遂糾衆互相報復讎隙日深滋蔓日廣良民被其擾害不得安居近年文武均以拘拏購捕空談敷衍了事兵差人等俱無敢入猺山傳

人緝犯者地處山僻距省遙遠地方文武多不據實稟報省城無憑核辦以致肆無忌憚愈逞凶殘本年正二月間疊據連州直隸州知州朱璟署連山綏猺廳同知輔良三江協副將宋福慶稟稱連山軍寮火燒等猺排與梅村上坪村民衆尋衅糾黨至菜園壩火鋪尾一帶焚掠礮斃民人迭經派撥兵勇查拏該猺排愍不畏法恃衆抗拒屢出肆擾該文武會稟請派兵勇查辦前來當經檄飭署南韶連道林賀峒抽調兵勇三百餘名馳往連山督飭地方文武將歷年民猺構衅之案澈底查辦安撫良猺嚴緝奸民其一二稔惡之猺排相機懲辦

以消亂萌旋據該道林賀峒查明自光緒元年迄今民
猺積案六十七起猺控民者僅止二起餘皆自逞強橫
肆行報復其兇惡最著之猺排爲殺人坪打鐵沖黃瓜
沖三排自來未經懲創而火燒寨新寨耳環沖等處實
爲黃瓜沖等排出入門戶該猺排屢釀巨案此次飭令
交凶屢抗不遵當經該道調派兵勇進火燒寨等處圍
捕該猺先已避匿各軍進燬其巢搜獲殲斃悍猺數名
而著名之皮道二汕里唐三諸凶均在逃未獲殺人坪
打鐵沖黃瓜沖三排仍負固不服中爐炕上蒔源六暗
三排仍復抗傳不到藐法情形極爲頑悍可惡臣惟民

猺相攻爲害無所底止必須將猺寨民寨歷年凶悍滋事之匪分別拏獲懲辦始足以弭後患而示持平惟猺人負山爲固伺便出擾民人恨之切齒若不先將猺排各匪搜獲懲辦只辦民寨之匪則民人不服然非懾以兵威則猺人斷不能交匪聽命此時若不早辦以後釀成巨案必致重煩兵力復經遴委候補通判鄭敦善署理綏猺同知就地募土勇五百名隨同林賀峒籌辦並飭將電綫由英德縣展接至連州以速軍報正在布置之際林賀峒適以丁憂離粵現在廣東道員中無可委辦之員茲查有廣西丁憂候補道前南甯府知府何昭

然果毅有爲曉暢兵事上年冬間經前撫臣沈秉成派辦慶遠府土族匪徒莫國經等滋事一案擒渠散脅辦理迅速尤見才識查猺排境接廣西事關兩省前經電商前廣西撫臣高崇基札調該道來東督辦連州猺排事宜所有連州連山兩屬文武及三江協弁兵並歸該道何昭然節制以一事權飭卽添募親兵一百名馳往連州連山等處體察情形妥爲辦理並調廣西分防平樂府之副將梁效賢率領部勇一營前赴猺山西面賀縣一帶堵遏以資協助現議辦理之法惟在分別良莠宣諭良猺勿得黨庇助惡其不法猺沖則分路扼要築

卡斷其鹽布木植貿易以困之焚山開路兵勇步步進
紮擇其排中腹心之地築礮紮營數月以後該猺必然
窮蹙自當縛獻凶渠一切咸受約束一面嚴飭民寨勒
交凶匪將歷年民猺互相劫擄之案澈底清釐其往來
猺山構衅滋事之奸民尤須捕獲懲辦以期永息衅端
再將築礮留營移官增汛各事宜詳切籌辦以期經久
綏安

硃批知道了欽此

張文襄公全集卷二十六終

紹興孫家棟校